

Segun PDA:

# INDEPENDIENTENAN DEN PARLAMENTO A BENDE NAN MES

Y haci mes esclavo di un solo persona

ORANJESTAD(AAN)—Segun PDA den e ultimo reunion di parlamento ehcuanto ceramento di cierto schoolnan, un biaha mas a keda demostra cu aki na Aruba democracia ta wordo atrapa.

PDA ta di opinion cu e mayoria di MEPden parlamento cu apoyo di cierto independentenan paga ta stroba un gobernacion sano y no ta sirbi interes di pueblo den nada.

"Ta tristo pa mira homber y muher grandi scapa, sinta den parlamento como representante di pueblo, pero sin voz, sin opinion propio. Marionetanan mara na man y pia pendiente di fabornan personal, sinta den parlamento solamente pa camufla y respalda e gusto of disgusto di nan dirigente. Mas tristo ta ainda cu ta yama nan mes independiente, esnan cu ta pretende di no ta mara na ningun partido pero mas peor ainda a bende nan mes y haci nan mes voluntariamente esclavo di un solo persona.

"Ta esakinan ta e representantenan di pueblo di Aruba na caminda pa independencia? Ta ki trato pueblo por spera mas, si ningun protesta, ningun petition apoya cu miles di firma no ta wordo scucha?" Ta locual PDA ta bisa den un comunicado.

Segun e partido, nos Arubianonan kier ta baas den nos mes cas. Mayoria a duna MEP mandato cu cnpfianza. Pa falta di sinceridad pa cu nos pueblo

MEP y su lider a pone elogio personal y probecho persona na prome lugar. E bienestar di Aruba a bira un lot den loteria, dependiente di resultado di e manipulacion di MEP cu empresanan ajeno, entre otro Melchior concern, segun PDA.

E lobonan politico cu di antemano tabata tin tur informacion, a sigur nan mes y nan familianan

Mientrastanto un parti grandi di nos poblacion ta bandonando nos Aruba tur desilusiona y bay bira ciudadanonan di segundo categoria na Hulanda. Kizas nan tin speranza cu esey lo ta mihor cu keda trapa den bo mes cas pa bo mes conciuadananon elitario, e partido ta menciona.

"Tur ta bay sin infor-

macion pasobra ni e informacion necesario e gobierno asocial aki no ta duna, pero MEP si ta mal-usa tur programa di informacion pa trece politica barata. Hasta diputado di enseñanza a purba justifica probechonan personal abiertamente na television", segun PDA.

E partido ta haci un suplica na esnan cu ta stima e pida baranca aki y kier keda biba aki na Aruba pa buta pia abao y no acepta abusanon aki mas, uni forza y kibra e mayoria di MEP. Mester bin un cambio politico positivo, segun PDA.

"Pa logra esaki ban tur hende stima Aruba, pasobra si nos no stimele, kende lo stime?" PDA ta puntra finalmente.

## AVP A PIDI REUNION DI PARLAMENTO Ariba ENSEÑANZA EN GENERAL

ORANJESTAD(AAN)—Sr. Watty Vos a declara na DIARIO ayera anochi cu fraccion di AVP den Eilandsraad a pidi pa un reunion di parlamento pa trata enseñanza en general y en particular Bijzonder Onderwijs.

Segun Sr. Vos, AVP a ripara cu BC no a tene cuenta cu e petition y e tantisimo firmanan entrega cu esaki y a nota cu SKOA tambe tabata bao di presion di gobierno di Aruba. Den Eilandsraad Sr. Eman a duna di cono-

ce cu SKOA a actua bao di presion di Bestuurscollege locual a ser desmenti pa diputado di enseñanza pero cu den carta cu SKOA a dirigi na mayornan di alumnonan di Ayo y di Martinus College ta ser poni bon cla;

"Directiva di schoolnan catolico di Aruba, SKOA despues di basta deliberacion a dicidi di cera Sr. Martinus School (mescos pa e School di Ayo) entrante 1 di agosto 1985.

E decision aki a ser tuma en vista di e medidanan di austeridad cu gobierno a impone...etc."

Sr. Watty Vos a bisa cu AVP a haya e necesidad di yama e reunion ariba esaki y cu AVP ta considera, mescos cu el a muestra durante henter su existencia, cu enseñanza ta base di henter un nacion y tin necesidad grandi pa yama e reunion y evita mas consecuencia negativo pa juventud.

AVP ta kere di lo por convence gobierno pa retrose y laga sano huicio prevalece ariba capricho politico, segun Watty Vos.

## POLITICA

Henny Eman:

## CONSTITUCION MESTER FORMA PARTI DI NOS CONSENCHI

E constitucion di Aruba a wordo compila durante e añan cu a pasa y awor a yega e momento pa refleha y puntra nos mes kende nos ta, con ta bira y compara nos mes cu otro paisnan. Paisnan tabata tin epocanan largo di desarrollo pa yega na e organizacion, e aregionan basico cu ta yama constitucion. Nan tabata tin e instinto natural pa yega na reglanan di organiza nan mes. Reglanan di organiza e gobernacion y cu ta stipula e actitud nan necesario di conciuadananon un pa cu otro. E impulsonan aki pa organiza y reglamenta e comunidad ta un impulso natural di sernan humano pa formaliza e respet mutuo cu mester tin entre sernan humano y tambe organiza gobernacion di un comunidad y organiza e administracion.

Tin paisnan cu te awe no tin nan constitucion por ehemplo Inglatera na unda un cantidad di reglanan ta existi, tambe un historia largo, pero no tin un constitucion skirbi. Hulanda, unda cu democracia tambe ta ehemplar si tin su constitucion skirbi. Den e constitucion di e diferente paisnan tabata tin e intencion, den e origen di e constitucion, pa establece paz y orden. Pero den transcurso di tempo e constitucion a cuminsa encera mas y mas derechonan fundamental di sernan humano, tanto esunnan clasico como despues den e desarrollo, e derechonan fundamental di sernan humano social. E derechonan clasico manera e regla di no discrimina pa motibonan di raza, sexo, color politico y demas. Tambe e derecho ariba enseñanza derecho ariba opinion liber pa expresa un opinion. Despues den constitucion tambe a bin e derechonan social por ehemplo e promocion di suficiente empleo y e derecho ariba vivienda.

Sr. Henny Eman ta sigui bisa cu representantenan di e pueblo arubano tin un tarea hopi responsabel, cual ta e tarea di bay crea un pais nobo, nos pais Aruba.

Paisnan otro, den hopi ocasion mester yega na nan constitucion pa medio di revolucion y gueranan sangriento. Nos taun pueblo privilegia cu den un ambiente pacifico ta formula con constitucion, e reglanan cu nos ta desea pa nos tur.

E pueblo Arubano ta un pueblo cu un propio caracter, un propio origen cu un mescla di un gran cantidad di diferente nacion y un gran cantidad di diferente raza. Un Pueblo cu a cuminsa su crecimiento aproximadamente na año 1600 pa dilanti, y tabata tin un procedura di crecimiento excepcional compara cu hopi pais. Esaki ta e motivo cu e desarrollo nan estatal tambe a bay y ta bayendo ariba un manera excepcional. Pueblo di Aruba nunca tabata un pueblo opreciona door di e colonisador, sino cu door di e colonisador y hunto cu e colonisador nos pueblo a wordo crea. Un pueblo consistiendo di un mescla unico di e cantidad di razanan y nacionalidadnan cu a bira e pueblo Arubano. Aruba awor ta ariba caminda di soberania y ta poniendo e prome paso di bira un pais ariba nos mes den reino hulandes.

Aki Sr. Eman a muestra ariba otro pais cu tin como origen casi e mesun historia cu esun di Aruba, y cu tambe tabata bao di e mesun madre patria cu Aruba y a bira independiente algun año pasa.

E pais aki, segun Sr. Eman tambe tin un constitucion por escrito cu ta ehemplar na mundo. El a wordo prepara door di hopi científico ariba tereno di derechonan estatal, pero lamentablemente e no por a wordo carga door di comunidad. Lamentablemente e comunidad di e pais ey no por a mantene nan constitucion. El a sigui bisa cu ta pa motibonan menciona nos mester ta conciente di cada paso cu nos ta tuma pasobra cu nos tin e mesun origen, e mesun historia y nos ta cay bao di e mesun madre patria, pero cu AVP ta convenci cu nos pueblo arubano tin den dje funda e sentimento pa democracia pero sin embargo laga nos tur aki na Aruba ser conciente kico e valor di libertad di sernan humano ta, kico e valornan ancla den nos constitucion tin di verdad.

Sr. Eman a enfatiza cu tur ora cu nos papia di constitucion no mester pensa solamente ariba e papelnan, e palabrnan y e letran, pero laga e constitucion ta algo cu ta forma parti di nos consenchi, cu ta forma parti di nos vida diario. Nos mester refleha y respira un disposicion pa yuda na e comprendemento comun cu ta ancla den nos constitucion.

Ban biba nos constitucion, ban cuminsa pa educa na nos schoolnan nos constitucion, Sr. Henny Eman a laga sa.

TUR ATARDI DI DIALUNA PA  
DIAVIERNA DI 5or PA 7or

E Programa di Estilo  
SINTONIA ABSOLUTO  
DEN 85



JOHNY'S  
GOLDIES